

# INUIT ATAQATIGIIT

## Inatsisartuni

15. august 2019



UKA2019/043

Inatsisartut suleriaasianni § 33 naapertorlugu aalajangiiffigisassatut siunnersuut imattoq saqqummiuppar:

**Pisortat ataatsimoortumik allaffissornerisa aaqqissugaanerannut atatillugu naliliinissamut ataatsimiitaliarsuarmik pilersitsisoqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut. Maanna suliassaasut aallaavigalugit allaffissornerup annertussusaa ataatsimiitaliarsuup nalilersussavaa, suleriaatsit sunniuteqarluarnerusut pilersinnissaannut immikkoortortaqarfiillu suliassaqarfiillu (sektorit) akimorlugit suleqatigiinnerup pitsanngorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviussaaq. Ataatsimiitaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiitaliarsuaq assigiinngissitaartuneersunit ilaliussanik sulisitaqassaaq, sulininilu ukiut marluk iluanni naammassisallugu. Tamatuma kingorna ataatsimiitaliarsuup innersuussutai Inatsisartuni politikkikut sularineqassapput.**

(Inatsisartunut Ilaasortaq Peter Olsen, Inuit Ataqatigiit)

### Tunngavilersuut:

Inuaqatigiit allaffissorfigineqarnerisa annertunaarneqarsimanerat aammalu pisortat namminersortunut naleqqiullugu allaffissornerisa inituallaarnerat oqaatigineqartualersimapput. Tamakkualu saniatigut aaqqissugaanitta nunat avannarlernisut aaqqissugaanera isornartorsiorneqartarpoq, massa nunat avannarliit inuttussutsimikkut, nunat atortulersugaanerisigut ilusaasigullu uagutsinniit allaanerulluinnartut. Tamakkualu pitsanngoriaasisanut allanguutissanullu suli periarfissaqartoq isumaqalersippaatigut. Akerliatigulli inatsisit ingerlatsinermut tunngasut malitagut allangujuissutsimik aaqqissuussamullu tatiginnissinnaanitsinnik kinguneqarmata puigussanngilarput. Taamatuttaaq nunanut millionilippassuarnut inulinnut naleqqiullugu innuttaasunut 56.000-iusunut inatsimmut piareersaatit sukkaneruneq ajornerat puigussanngilarput. Allaffissornerput pillugu politikkikut oqallittuarnerput kinguneqartittariaqalerparput. Atagu

isummersuutinik allanik oqallinnitsinni aallaavigisinnaasatsinnik periarta. Pisaq ima piuminaatsigivoq sukumiisumik suliareeqqaartinnagu aalajangiiviginnaanatigu – suliassamullu tassunga ataatsimiititaliarsuaq tulluartuuvoq. Isumarput naapertorlugu ataatsimiititaliarsuaq assigiinngissitaartunik inuttaqartariaqarpoq allaffisornerullu avataaneersunit aamma ilaasortaqartariaqarluni. Ullut tamarluinnaasa allaffinni sulisorpassuit ataqqigaluarlutigit, namminneq suliamik iluanni eqqarsaatnik nutaanik takujuminaatsisisinnaapput. Assersuutigalugu naalakkersuisoqarfimmi pisortaastrup suliaqarfimmi siunissami atorunnaarsinneqarnissaanik allatorluinnarluunniit aaqqissuunneqarnissaanik eqqarsarnissaq ajornakusoortissavaa. Tamatuma saniatigut ataatsimiititaliarsuup assigiinngissitaartumik inuttalimmik ilaliussamik sulisitaqarnissaa, følgegruppeqarnissaa, takorloorparput. Atorfilittaasinnaapput, ilisimatuut, politikkikut partiit, ingerlatsivinni pisortat, ilinniagaqartut inuillu allat nutaanik pilersitsisinnaasut. Suliassap isumaginissaa ukiunit marlunniit sivisunerusariaqanngilaq, taamaasillunilu ataatsimiititaliarsuaq 2021-imikukkut ataatsimiinnermi isumaliutissiisummit saqqummiussisinnaassaaq.

**Pisortanut aningaasaqarnikkut allaffissornikkullu kinguneqaatit**  
Suliassat aalajangersarnerat ataatsimiititaliarsuarmilu ilaliussatullu sulisitassap ilaasortassaanik toqqaanissaq aningaasaliissutaareersut iluanni isumagineqarsinnaapput. Ataatsimiititaliarsuup allaffisorneranut siunnersorterpassuit avaataaniittut arlaat suliakkersinnaavarput. Tamanna soorunami akisunerulersitsissaaq, taamaattorli suliap ingerlanerani nutaanik eqqarsaatersornissamut peqataasinnaapput. Ataatsimiititaliarsuarmut aningaasartuutit ukiuni marlunni ukiumut 2 mio. kr.-it naammassapput.

**Namminersorlutik inuussutissarsiortunut aningaasaqarnikkut kinguneqaatit  
allaffissornikkullu**  
Piffissaq qaninneq eqqarsaatigalugu soqanngilaq. Piffissaq ungasinnerusoq eqqarsaatigalugu allaffisorneq eqaannerusumik aaqqissuussaq anguneqarsinnaassaaq, tamannalu namminersortunut aamma iluaqutaasinnaavoq.

**Innuttaasunut aningaasaqarnikkut allaffissornikkullu kinguneqaatit**  
Piffissaq qaninneq eqqarsaatigalugu soqanngilaq. Piffissaq ungasinnerusoq eqqarsaatigalugu allaffisorneq eqaannerusumik aaqqissuussaq anguneqarsinnaassaaq, tamannalu innuttaasunut aamma iluaqutaasinnaavoq.

